

Svör Samfylkingarinnar við spurningum HRFÍ

1. Hver er stefna flokksins varðandi einangrunarvist hunda við flutning til landsins? Einangrun er nú fjórar vikur frá komu til landsins.

Þingmenn Samfylkingarinnar hafa lengi barist fyrir því að tekin verði upp gæludýravegabréf í stað einangrunar og höfum við lagt fram frumvarp þess efnis í þrígang. Það eru í raun engin efnisrök fyrir þessum ströngu reglum sem gilda hér og þessi langa einangrun því mikil tímaskekkja.

2. Hver er stefna flokksins varðandi aðgengi hunda almennt í; Almenn farþegarými samgöngutækja?

Reglugerð um hollustuhætti bannar flutning dýra í almennum farþegarýmum samgöngutækja að undanskildum hjálparhundum. Það þyrfti að gera breytingar á reglugerðinni eða veita undanþágu frá henni. Við viljum gera hundaeigendum auðvelt fyrir að taka hundana sína með í almenningssamgöngur og sem dæmi þá er Strætó bs. með slíka vinnu í gangi og við bíðum niðurstöðu úr henni. Hluti af þeirri vinnu felst í að ræða innanríkisráðuneytið um nauðsynlegar breytingar á reglugerð.

3. Hver er stefna flokksins varðandi aðgang hunda að húsrýmum á borð við; Gististaði, veitingahús og íþróttahús?

Flokkurinn hefur ekki markað sérstaka stefnu um aðgang hunda að húsrýmum. Samhliða skoðun á breytingum á reglugerðum til að auðvelda eigendum hunda að taka þá með í almenningssamgöngur er eðlilegt að skoða hvort auðvelda eigi aðgang gæludýra að húsrýmum.

Svör Sjálfstæðisflokksins við spurningum HRFÍ

1. Hver er stefna flokksins varðandi einangrunarvist hunda við flutning til landsins? Einangrun er nú fjórar vikur frá komu til landsins.

Sjálfstæðisflokkurinn telur brýnt að viðhafa allar nauðsynlegar varúarráðstafanir til að vernda búfénað landsins. Hins vegar hefur á vettvangi flokksins verið fjallað um að óþarflega langt sé gengið í einangrunarvist dýra með tilliti til þess hvað eftirlit með dýrum hefur eflst erlendis og því geti verið rétt að taka vottun til þess bærra aðila frá þeim löndum sem hafa eins reglakerfi og Íslendingar góða og gilda. Sú skoðun hefur þó ekki enn sem komið er endað í formlegri ályktun flokksins.

2. Hver er stefna flokksins varðandi aðgengi hunda almennt í; Almenn farþegarými samgöngutækja?

Sjálfstæðisflokkurinn hefur staðið að því að Strætó bs. taki til endurskoðunar bann við að fara með hunda í Strætó.

3. Hver er stefna flokksins varðandi aðgang hunda að húsrýmum á borð við; Gististaði, veitingahús og íþróttahús?

Sjálfstæðisflokkurinn hafði forgöngu og fékk samþykkt í borgarstjórn að beina því til ríkisvaldsins að láta af miðstýrðum reglum um bann við gæludýr í opinberum rýmum á borð við kaffihús. Þingmaður flokksins, Hildur Sverrisdóttir, fylgdi því síðan eftir á Alþingi í vor sem leiddi til þess að umhverfisráðherra boðaði að reglurnar yrðu rýmkaðar. Sjálfstæðisflokkurinn mun fylgja eftir þeirri stefnu á nýju kjörtímabili þar sem það er sjálfsagt frelsismál að til að mynda kaffihúsaeigendur ráði því sjálfir hvort þeir vilja bjóða hunda velkomna inn á kaffihús sín en að slíkt bann sé látið ná til allra miðstýrt af ríkinu.

Svör Pírata við spurningum HRFÍ

1. Hver er stefna flokksins varðandi einangrunarvist hunda við flutning til landsins? Einangrun er nú fjórar vikur frá komu til landsins.

Píratar vilja taka upp gæludýravegabréf að erlendri fyrirmynd. Einangrunarvist gæludýra við innflutning til landsins er tímaskekkja m.t.t. tækniframfara og stenst ekki reglugerðir um dýravelferð. Píratar styðja endurskoðun áhættugreiningarinnar sem er núverandi grundvöllur innflutningslaga og fögnum þeirri vinnu sem HRFÍ hefur komið að í samvinnu við fráfarandi landbúnaðar- og sjávarútvegsráðherra um vinnslu nýs áhættumats af erlendum fagaðila.

2. Hver er stefna flokksins varðandi aðgengi hunda almennt í; Almenn farþegarými samgöngutækja?

Píratar vilja að gæludýraeign teljist til frumréttis. Það hefur ekki verið samþykkt stefna þess efnis ennþá, en stefnumótunarhópur Pírata um dýravelferð beitir sér fyrir því að gæludýraeigendum sé ekki mismunað við notkun almenningssamganga, enda þurfi að ferðast með gæludýr á milli staða. Aldrei skal skerða aðgengisréttindi þeirra sem þurfa á leiðsögu- eða hjálparhundi að halda.

3. Hver er stefna flokksins varðandi aðgang hunda að húsrýmum á borð við; Gististaði, veitingahús og íþróttahús?

Píratar vilja að eigendur gististaða, veitingahúsa, íþróttahúsa og annarra mannvirkja sem eru aðgengileg almenningi geti sjálfir ákveðið hvort þeir leyfi aðgengi hunda og annarra gæludýra. Aldrei skal skerða aðgengisréttindi þeirra sem þurfa á leiðsögu- eða hjálparhundi að halda. Annað: Píratar hafa nefnt að hjálpar- eða stuðningshundar að erlendri fyrirmynd (emotional support dog) sé eitthvað sem vert sé að skoða hér á landi. Eins og stendur eru einungis leiðsöguhundar fyrir sjónskerta sem njóta sérstakra réttinda varðandi aðgengi og annað. Hjálpar- og stuðningshundar hafa náð margsönnuðum árangri í stuðningi velferðar, heilsu og geðheilsu manna.

Svör Viðreisnar við spurningum HRFÍ.

1. Hver er stefna flokksins varðandi einangrunarvist hunda við flutning til landsins? Einangrun er nú fjórar vikur frá komu til landsins.

Eitt af síðustu verkum Þorgerðar Katrínar Gunnarsdóttur sem Landbúnaðar- og sjávarútvegsráðherra var að kalla eftir nýju (og löngu tímabæru) áhættumati við innflutning gæludýra. Að baki því embættisverki fyrir hönd Viðreisnar stóð sú von að taka upp gæludýravegabréf að erlendri fyrirmynd að áhættumatinu loknu.

Hefur nú verið fenginn óháður erlendur aðili til að meta þörf á sóttvarnaraðgerðum sem í hvívetna eru metnar í samhengi við aðra áhættu eins og smit með mönnum. Aðferð sem valin verður þarf að duga til að verja landið smitsjúkdómum en má ekki ganga lengra en þörf krefur og taka þarf tillit til úrræða á borð við bólusetningar og rannsóknir fyrir komu dýra til landsins. Við þurfum að viðurkenna hunda og önnur gæludýr sem hluta fjölskyldunnar og gæta mannúðar við meðferð þeirra.

2. Hver er stefna flokksins varðandi aðgengi hunda almennt í; Almenn farþegarými samgöngutækja?

Í sumar hófst vinna þingflokks við að móta hugmyndir um hvernig best yrði staðið að því að heimila hunda um borð í samgöngutækjum. Þetta ætti að gera í samræmi við reglur nágrannalanda okkar og með tilliti til skýrslu Strætó þar sem komist var að þeirri niðurstöðu að heimila aðgengi hunda til reynslu.

3. Hver er stefna flokksins varðandi aðgang hunda að húsrýmum á borð við; Gististaði, veitingahús og íþróttahús?

Viðreisn kallar eftir því að veitingahúsum o.fl. stöðum verði það í sjálfsvald sett að heimila eða banna aðgang hunda og annarra gæludýra, líkt og gengur og gerist erlendis.

Svör Miðflokksins við spurningum HRFÍ

Miðflokkurinn var fyrst stofnaður formlega sunnudag 8 október síðastliðinn. Við höfum ekki mótað stefnu um öll mál en mun það vera gert á næstu misserum. En í stórum dráttum er stefna Miðflokksins á heimsíðu Miðflokksins sjá: www.midflokkurinn.is/kosningastefna/

Verið velkomin að hitta forsvarsmenn og konur miðflokksins eftir kosningarnar í spjall um hagsmuni hundaeigenda

Svör Alþýðufylkingarinnar við spurningum HRFÍ

Alþýðufylkingin hefur ekki stefnu í neinu af þessum málum. Varðandi sóttkví fyrir hunda og önnur dýr sem eru flutt lifandi til landsins, mundum við fylgja ráðum dýralækna.